

الفاجومي

الليثي عبد الناصر: ألويا أنور
السادات: تمام يا فندم

- قصة قصيدة «كلب الست».
- ضارب الرق الذي أنشأ تنظيم «الجبَّاط الأشرار»
على إيقاع الضباط الأحرار.
- محتل غلبان خدع السادات وخذ منه ٥٠٠ جنيه
من المال العام؟

obekikan.com

المعروف عنى إنى طول عمرى من دراويش الست أو كلثوم.. عاشق صبابه ومغرم متيم بصوتها السماوى الساحر وفنها الأصيل.. مش بس كده.. دانا كنت هاريهم كلام فى الموضوع ده.. وأحياناً ماكتتش باستكفى بالمعلومات الصحیحه فكنت باخترع معلومات من عندى تحلى الكلام وتسخن القعه.

وكنت لما بسخن باتكلم عن زكريا والسنباطى والقصبجى ويبرم وأحياناً شوقى باعتبارهم أصدقاتى بنقعد سوا وبنأخذ وندى فى الكلام ورافعين الكلفه لدرجة إنهم يقولولى:

يا أحمد وأنا أقولهم يا زكريا ويا رياض ويا بيرم وهكذا، ممكن السامعين ما كانوا بيصدقوا أكاذيبى.. لكن ماكانش حد فيهم بيعترض وكانت ليالى الست ما تحلاشى إلا بالعبد الفقير.. كان الشاطر فى صحابى هو اللى يخطفنى بدرى ليلة الست عشان القعه تحلاطب إزاي بقى أنا أكتب القصيده دى؟ أنا ح أحكى الحكايه من أولها ورزفى على الله.

كنا فى أوائل الستينيات يعنى فى عز عز الإشتراكيه وتحالف قوى الشعب بعد ارفع رأسك يا أخى فقد مضى عهد الاستعباد بحوالى عشر سنين يعنى كان الطب اتقدم جداً والناس اتنورت وبقينا مواطنين لا رعايا إلى آخر الشعارات النميسه دى! وذات صباح جميل طلعت علينا الصحف القوميه الثلاثه الأهرام والأخبار والجمهوريه بخبر عجيب، بدون أى تعليق اللى فاكره إن كمال الملاح أبرز الخبر فى صحفته اللى فى شهر الأهرام بعنوان- من غير عنوان- أبرزه إزاي؟ عمل حواليه دايره حمراء ما أعرفش بقى يقصد إيه؟ المهم إن الخبر بيقول حفظ التحقيق فى قضية كلب أم كلثوم وبعد كده حيثيات الحفظ العجيبه! إيه الحكايه؟ قالك إن طلبة معهد التربيه بالهرم كانوا عاملين يوم رياضى مع طلبة كلية الفنون الجميله بالزمالك- يعنى ورا فيلا أم كلثوم- وكانت المسابقات حتقام على ملاعب كليه الفنون.. حلو كده؟

طبعاً بعض الطلبة راحوا الزمالك بعريياتهم الخصوصيه وبعض خدوها موتورجل..
 الإخوه تبع الموتورجل فايتين قدام فيللا أم كثوم وإذا بكلبها العزيز المدلل ينط من
 السور يبقى فى الشارع ويتشن على أفقر طالب اللي هو المدعو إسماعيل خلوصى
 ويروح ناطط فى كرشه مبعتره بدون سابق معرفه، وبكده يا أصدقائى يبقى مشروع
 عمكو خلوصى أبو إسماعيل اتدمر تماماً.. لأن المفروض إن أبو السباع كان حيثخرج
 مدرس ألعاب رياضيه وتبتدى العيله تاكل من خيره لكن بعد العاهات المستديمه



فى البوليس
بكره تتولف وزاره
للكلاب
ياخدوك رئيس



أول رمضان أقابله فى حوش آدم كان شايل لى كيس من الهدايا والمفاجآت
المدهشه..

بدأت بالفطور فى بيت الشيخ والفطور فى بيت الشيخ معناه الاستمتاع بما لذ
وطاب من الوجبات الرمضانيه وغير الرمضانيه من يد ست الكل الحاجه أم سعد.

وبعد الفطور وصلاه العشا والتراويح اتنصبت القعه.. أغلب الوجوه معروفه
بالنسبه لى.. أحمد الموجى شقيق سعد الموظف وشقيقهم الأصغر الفنان جمال
الموجى اللى كان لسه طالب بكلية الفنون الجميله وعمهم سعيد الموجى وكيل
الفنانين المعروف وعازف الإيقاع فى تخت أم كلثوم لكن الجديد فى الموضوع
شخص ربه كبير الراس قدمهولى أحمد الموجى:

- أبو على الموجى.

قلت له:

- أهلاً.

قال لى:

- أهلاً بيك يامعقدنى.. تصور إنى بعد ما قرئت كلب الست بطلت أكتب
شعراً!

أنا اعتبرت المسأله مجرد مجامله.. لكن استكثرت عليه عبارته إنه كان بيكتب شعر
من أساسه وخصوصاً وإنى لاحظت أنه ما بيعرفش ينطق حرف السين والصاد..

بينطقهم شين فاحتقرته واديته الطرشه وبدأت أعمل أحاديث جانبيه هامسه مع عليه القوم من باب المنظره!

حبتين وبدأ إمام يدوزن العود وفوجئت بيه بيقول:

- فين أبو على الموجي؟

قال له الشخص:

- أنا معاك يا مولانا.

قال له:

- تعالى جنبى هنا.

قام قعد جنبه راح جمال الموجي مناوله علبه جلد سودا مربعه فتحها وطلع منها رق مدندش وقعد يمسح بإيده على جلد الرق بحركه دائريه إلى أن انتهى الشيخ إمام من دوزنة العود وبدأوا يعزفوا مجموعه من البشارف والسماعيات الشرقيه الجميله وفوجئت بأبو على الموجي بيحول الرق بين إديه إلى كروان ساحر الصوت والإيقاع بصيت على وشه لقيته رايح فى غيبوبه وملامحه المنفره بدأت تاخذ شكل جميل رحت ناطط من ع الكرسي وقاعد تحت رجليه وكأنى باعتذر له عن الجلافه وقلة الأدب اللى قابلته بيهم..

رحله ساحره مع المغنى الأصيل غسلتني من ساسى لراسى انتهت ساعه السحور بالموشح الجميل اللى كنت بارده معاهم وكأنى باكلم أبو على الموجي..

مولاي كتبت رحمه الناس عليك فضلاً وكرم

فالمرجع والمآل والكل إليك

عُربٌ وعجم

مالي عمل يصلح للعرض عليك

بل صار عدم

فارحم ذلى ووقفتى بين يديك

إن زل قدم



بعد الليله دى بدأت علاقتى بحسن الموجى ابن خال سعد تتوطد.. هو كان ساكن فى الحدائق وكان بقى له سنوات هاجر حوش آدم فبدأ ييجى كل يوم بعد ما يخرج من شغله ويفضل معانا لآخر الليل.

شخصيه مركبه صعب التعامل معاها.. يعنى عايز صبر.. فنان متعدد المواهب بيكتب ويلحن ويغنى ويعزف ويمثل ويخرج ومع كل هذا ما حققش أى حاجه - وصل فى الدراسه إلى سنه تالته هندسه بتفوق مذهل وفجأه انتهى كل شىء وفصل من الكليه لتعدد مرات الرسوب!! فقد إيمانه بأى شىء وكل شىء.. عارف كل حاجه.. ومش مصدق أى حاجه.. كل شىء فى الدنيا مترتب مسبقاً واللى مرتبينه اليهود.. حتى الكوره سياسيه.. الأهلى والزمالك هما يهود الكوره وعشان كده هو كان يشجع الترسانه.. الثوره وعبدالناصر.. كل دا مترتب وما فيش فايده فى أى حاجه.. كنت دايمًا باختلاف معاه وباسفه كلامه وكان الخلاف بيوصل لدرجة الصريخ.. لكن لما كان يمارس الفن كنت باقعد قدامه مشدود زى التلميذ البليد.. يقولك:

احنا شعب ندل.

نشتم المندار بوشه

والنصاحه

لو نغشه

ما احنا شعب ندل

الركوب فى الزحمه يحلا

واللى يهبط

واللى يعلا

ما احنا شعب ندل

الدكاتره بالأونطه

ألف أهيف ع الزغظه

ما احنا شعب ندل

وبعد ما يعدد مجموعه من صور السلبيه فى حياتنا يقول:

قالوا لى ما قلتهاش ليه

فى الإذاعه

قلت لهم إحنا شعب ندل



طبعا القصيده دى كانت بتستفزنى وما كنتش باحب أسمعها وكان هو عارف

كده فكان أول ما يقابلنى يقول لى:

- إحنا شعب ندل.

وبعدين فضل يطورها لحد ما سمانى أنا شخصيا «الندل الأعظم» وكان أبو على

الموجى ملموم على شله محبطين من جيرانه فى حدايق القبه بيبث فيهم أفكاره

العدميه وكان مسميهم تنظيم «الحباط الأشرار» على وزن الطباط الأحرار.. وكانت

هوايتهم ممارسه الشر ضد بعضهم وكان هو أكثرهم عبقرية فى توضيب المقالب

لدرجة إنهم كانوا مسميينه - الأستاذ وسخ الموجى - هو كمان ما كانش مقصر فى

حقهم.. وشوف بيوصفهم إزاي:

أنا رمه

ما فيش همه
وكان ممكن
أكون قمه
لكن خاننى
غرور ظنى
وكان ممكن
يوصلنى
فرق تكة
قفل سكه
فقلت اركن
على الدكه
لقيت شله
ما فيش مله
نجيب الفقر والذله
تلات تسطر
ترانزستور
يارب استر
يارب استر

•••

وله فى شكوى الزمان قصيده كاتبها وملحنها يقول مطلعها:

أنا حظى عجب
وتمللى كده بيخلى العقل يطير
وحاجات ياما بتحصل لى
لما تمللى عاديكو باغير
م اللى الحظ بيديله
ويبقى عاطى له وعنده كثير
دنا متهيالى أفرع
ولا أوقع نفسى ف بير
المهم إن حسن الموجى بوجوده معنا كان إضافه لها قيمتها للصوت اللى بعد كده
طلع من حوش آدم ووصل لكل الأسماع العربيه فى شتى أنحاء الأرض.



الفقير من قله حيلته بيحلم وعشان كده يقولوا:

- «الجمعان بيحلم بسوق العيش».

وساعات لما الحلم ما بيسعفوش بيلجأ للنميمة كنوع من أنواع الانتقام ولأن كل
القوانين اللى فى العالم موضوعه عشان تحمى الغنى م الفقير فالفقرا بيعتبروا أى
خارج ع القانون بطل شعبي.

كنا قاعدين فى المنظمه - أهل تحت - وبتكلم فى التفاوت الاجتماعى الصارخ
فى مبنى المنظمه بأدواره الثلاثه..

الفقير بيزيد فقر والغنى بيزيد غنا..

وجرنا الكلام للسؤال السرمدى:

- طب وبعدين؟

الأستاذ عوف مساعد المخرج المزعوم حسم المناقشه ورد على السؤال:

- ما تتعيبش نفسك يا تعبان أنت وهو.. فيه قانون بيحكم العالم وملخصينه في عبارة - يبقى الحال على ما هو عليه وعلى المتضرر اللجوء للقضاء - ولعلمك بقى يا مخشمون أنت وهو العبارة دى موجوده في كل لغات العالم! لكن محمد الأسوانى واحنا مروحين واستكمالاً للمناقشه حكى لى حكاية غريبه عن عامل سويتش كان فى المنظمه وسابها..

العامل ده كان عنده تسع عيال وهو ومراته وكان مرتبه تمانيه جنيه فى الشهر!.. يعنى كان فى الدمار لدرجه إن يوسف بيه كان مسكنه ببلاش فى بيت قديم من بيوت العيله فى شبرا..

ويبدو إن أخونا ده كان هارى نفسه تصنت على المكالمات فاكتشف علاقه متينه بين بعض الأشخاص فمكديش خبر.. طلب السيد أنور السادات اللى كان أيامها سكرتير عام المؤتمر الإسلامى وقلد صوت الليثى عبدالناصر:

- آلو يا أنور.. أنا الليثى عبدالناصر..

- أهلاً يافندم.. أهلاً أهلاً..

- أهلاً بيك أنا ح أبعث لك ولد اسمه كذا إبعث لى معاه خمسميت جنيه..

- حاضر يافندم..

واستأذن صاحبنا وخرج من مبنى المنظمه وع المؤتمر الإسلامى وجاب الظرف اللى فيه المبلغ وسدد ديونه ورش رشه جريئه على السعاه والفراشين فى المنظمه وزعم إن له عم مليونير فى البرازيل توفاه الله وانه هو الوارث الوحيد لهذا العم المليونير. حلوا كده؟ خلصوا الخمسميت جنيه فى ظرف شهر. أخونا قالك أعملها تانى و..

- آلو يا أنور.. أنا الليثى عبدالناصر..

- أهلاً يافندم.. أهلاً أهلاً..

- أهلاً بيك أنا ح ابعت الولد تديله تلتमित جنيه..

- أمرك يافندم..

يقوم يشاء السميع العليم إن صاحبنا يحط السماعه من هنا ويتصل الليثي عبدالناصر بالسادات من هنا ويبدو إن كان فيه حاجه مطلوبه فقال:

- طيب يافندم لما ييجي الولد اللي انت باعته ح أديها له..

- ولد مين؟

- الولد اللي سيادتك باعته.

- أنا باعت لك ولد؟

- أبوه يافندم دا هو في الطريق.

- طيب لما ييجي حوشه عندك أنا جاي فوراً..

•••

